

PRATAMA SARGAH

Haran lan Wawidangan Desa

Pawos 1

1. Desa puniki mawasta "Desa Pakraman Gumung", salantur ipun kinucap, kalih kasuratang ri sajroning lekita "Desa Pakraman Gumung".
2. Wawidangan Desa pakraman Gumung mawaneng nyatur Desa, manut sakadi kinucap ring sor puniki :
 - ha. Tepi siring wetan utawi Kangin : tepi kauh Desa Bungaya
 - na. Tepi siring kidul utawi Kelod : Tepi kaler Br Dinas Bukit Kangin
 - ca. Tepi siring kulon utawi Kawuh : tepi kangin Desa Tenganan Pegringsingan
 - ra. Tepi siring lor utawi Kaler : tepi kelod Br Dinas Bukit Kauh
3. Sajroning wawengkon Desa Pakraman Gumung, wenten bebanjaran, sowang-sowang mawasta Banjar Pakraman, lwire :
 - ha. Banjar Adat Gumung
 - na.

DWITYA SARGAH

PIKUKUH LAN PATITIS TATUJON

Pawos 2

Maka pikukuh, Desa Pakraman Gumung, ngrajegang, mikukuhin, kalih mitindihin pisan :

1. Pancasila
2. Undang-Undang Dasar 1945
3. Tri Hita Karana

Pawos 3

Desa Pakraman Gumung ngamanggehang patitis tatujon, lwir ipun :

1. Ngutamayang tata cara maagama Hindu
2. Ngawangunang, katreptian sajroning Desa pakraman, mangda kasidhan rajeg katreptyaning praja sadaya
3. Ngawrediyang kawicaksanan minakadi kaprajnanan maka larapan gumawe gemuh landuhing praja
4. Ngamanggehang kalih ngawrediyang dreweyaning Desa, majalaran kawicaksanan guna laksana manut dharma prawreti
5. Ngarajegang dharma agama miwah dharma nagara.

TRITYAS SARGAH

SUKERTA TATA PAKRAMAN

Palet 1

Indik Krama

Pawos 4

1. Sane kasinanggeh Krama Desa Pakraman Gumung , lwire :
 - ha. Sang sapisira hugi jenek magenah ring wawengkon Desa Pakraman Gumung
lintang ring tigang sasih utawi 105 dina, sane kasinanggeh karma Desa
 - na. Sang sapisira hugi wed saking Desa Pakraman Gumung, jenek magenah ring dura Desa liwaring Desa Pakraman Gumung, nanging kantung mipil ring sinalih tunggil banjar pakraman utawi dadia sane wenten ring sajroning Desa PakramanGumung, sane mula pagenahanya nguni
2. Papalihan pakraman, kadi ring sor puniki :
 - ha. Krama ngarep : krama Desa sane bulangkep, sane sampun mipil ring sinalih tunggal
banjar pakraman sane wenten ring sajroning Desa pakraman Gumung
 - na. Krama kakkuwuban , inggih punika, krama Desa sane durung mipil ring banjar, sakadi deha teruna, truna tuwa, deha tuwa, sane kantung kakuhub antuk krama ngarep
 - ca. Krama panyada, krama Desa sane sampun tan keni ayahan, lwire :
 1. Sangkaning mapinunas ngaraga, saha polih palugrahan Parjuru Desa Desa Pakraman Gumung.
 2. Sasampun tan mresiddhayang mayahan, mayusa lintang ring 60 tiban, manut panglokikan Parjuru Desa Desa Pakraman Gumung
 3. Mabukti sungkan rahat tan sidha waras, manut panglokikan Parjuru Desa Desa Pakraman Gumung
 - ra. Krama balu inggih punika krama Desa lanang wiyadin istri, sane katinggal seda, antuk utawi nyapihan antuk rabiniya kabawos balu, Wenten balu camput, wenten balu masantana
 - ka. Krama nglaga inggih punika, sang sapisira hugi wed saking Desa Pakraman Gumung, jenek magenah ring dura Desa liwaring Desa Pakraman Gumung , nanging manggeh mipil ring banjar.
 - Da karama sesabu inggih punika karama sane ngenahin wewidangan desa/ngarangin di desa pakraman Gumung sane nenten keni ayahan seurah arih.
3. Krama tamyu, inggih punika krama sane kinucap kadi ring sor puniki :
 - ha. Sang sapisira hugi saking liwaring Desa Pakraman Gumung, jenek magenah ring wawengkon Desa Pakraman Gumung, tan ngawengku karang pomahan, madadunung ring pomahaning krama Desa, magenah

- ring pomahan druwen guru wisesa, hotel miwah saluwir ipun, lintang ring tigang sasih utawi 105 dina
- na. Sang sapisira hugi wed saking liwaring Desa Pakraman Gumung makakubon ngenahin palemahan tegal, carik, palasan, ring wawengkon Desa Pakraman Gumung, nanging kari manggeh makrama Desa ring kamulan Desanya, kabuktiyang antuk surat sasinahan saking Keliyang Desanya
- ca. Sang sapisira hugi jenek magenah ring Desa Pakraman Gumung, yan tan maagama Hindu, taler sinanggih tamyu, sareng sapolikramaning Desa Gumung ring wewengan Pawongan lan Palemahan.
4. Krama ngajag ,inggih punika Sang sapisira hugi rawuh ka jroning Desa Pakraman Gumung, mawaneng adina patut matur supeksa ring Parjuru Desa Desa yan tan asapunika kadi memurug wenang katundung sakeng D.P Gumung

Pawos 5

Ngawit tedun makrama Desa ,ring Desa Pakraman Gumung.

1. Krama Desa sane mawed kalih jenek ring wawengkon Desa pakraman Gumung, , malarapan antuk tateragan Banjar, lwire : sampun bulangkep tigang sasih utawi 35 dina, saking dina rangkate;
 2. Krama Desa wed saking Desa Pakraman Gumung, matinggal ka dura Desa,miwah usan wastu malih mawali ka Desa Pakraman Gumung :
- ha. Yan sangkaning rahayu kalih saking palugrahan Parjuru Desa Desa patinggale nguni, wenang mawali mipil ring banjar pakraman sinalih tunggal sane wenten jroning Desa pakraman Gumung, nganutin sukretan banjar pakraman punika sowing-sowang
- na. Yan sangkaning tan rahayu patinggale nguni, yogya Kliyang Banjar sane katuju ngatengahang babawose ka Desa, manggda kabawosan antuk Parjuru Desa Desa, yan katinutin tatepasan Parjuru Desa Desa punika, tur kacihnayang antuk maguru piduka ring Pura Puseh Gumung, prasiddha kalugra mipil pinaka krama Desa Pakraman Gumung, saha keni pangetang beras 250 Kg.

Pawos 6

Husan makrama Desa ring Desa Pakraman Gumung, malarapan antuk :

1. Seda
2. Sangkaning pinunas ngaraga, saha polih palugrahan Parjuru Desa Desa Pakraman Gumung
3. Tedah utawi tilar saking Agama Hindu.
4. Tan keladenan
5. Kanorayang antuk Desa

Sulur kalih tata cara nganorayang lwire :

Ha Pastika wenten dosan ipun

na Tan tinut ring pituduh Prajuru indik nyupat raga ngehehin solah prawrerti

ca Katiwakin pamidanda nerima olih kelihan Desa(BenDesa adat)

ra Pamidanda inucap, katur ring Pemerintah

Pawos 7

(1) Swadharmaning krama Desa :

- ha. Krama ngarep yogya keni ayahan, tata turun cumek, nyanggra saraja karyyan Desa, manut hunggwan sowang-sowang
- na. Krama kakuwuban yogya ngremba saraja karyya sane kapucukin antuk krama Desa ngarep, yan wenten pabuwat saking Desa, kahunadikayang antuk Parjuru Desa Desa
- ca. Krama balu lanang wiyadin istri, tan keni tata turun. Yan balu punika ngamong karang Desa keni panigasanan beras 5 Kg satunggil aci Usabha Puseh. Kawekas yan okane lanang wiyadin istri sampun napak wiring utawi munggah teruna, patut krama balu punika mayahan matata turun cumek, kabulangkepin antuk okane.
- ra. Krama tamyu, wenang keni prabiya pamahu desa manut pararem
- ka. Krama Desa panglagaan, tan keni ayah-ayahan miwah lan-lanan, nanging manut pararem
yogya nawur pasabuhan ka Desa satunggil aci Usabha Puseh, gung artha manut kaputusan paruman Desa
- da. Krama sane tan maagama Hindu, sareng sapolikramaning Desa, nanging tan wenang piwal ring awig-awig, paswaran Desa, pararem Desa, sane ngindikang tata pawongan miwah palemahan.
- ta. Krama sane ngenahin karang Desa sane nenten sareng maayahan maurah-arih keni panigasanaan beras 20 Kg, ngamasa , satunggil aci Usabha Puseh
- sa. Krama Desa samiyan yogya saturut ring daging Awig-awig Desa Pakraman Gumung, paswara miwah pararem Desa, ngutsahayang mangda kasiddhan mapikolih sakadi patitis tatujon Desane , tumus mamangguhang jagathitan.
- wa. Krama Desa sane pacang ngadol,,masewayang,maselangang,makedihang ngadeang nukarang, palemahan carik, tegal, miwah sane sewosan sane magenah sajroning wawidangan Desa Pakraman Gumung, ring anak saking dura Desa, hugi mangda polih palugrahan saking Parjuru Desa Desa.

1. Phala-peksaning krama Desa :

- ha. Krama Desa samiyan yogya polih pasayuban wiyadin pangoban saking

- Desa, salwiring wyawaharanyo yoga kabawosan antuk Parjuru Desa
Desa manut tata titining wyawahara.
- na. Krama Desa samiyan sane maagama Hindu wenang ngalaksanayang
Panca yadnya, sajroning Desa Pakraman Gumung, manut Desa kala
patra, sastra agama, miwah nganutin siman Desa hinucap.
- ca. Krama desa sane jagi nganggen druwen desa sane nenten mipil ring banjar
utawi desa, patut matur supeksa ring prajuru desa keni penanjung batu
Manut prarem
- ra. Krama Desa ngarep samiyan wenang polih babagian layuban aci-aci
salwiripun, twas-twasan, miwah sawosan sane patut katiba ring krama
Desa
- ka. Mapawangked, nyaluk, tan tedun maayahan, yoga saking pa nglokikan
kalih palugrahan Parjuru Desa Desa

Palet 2

Indik Parjuru Desa

Pawos 8

Desa Pakraman Gumung puniki, kahemong antuk Parjuru Desa Desa sane ketah
kabawos :

- Ha Keliang Desa utawi Bendesa
Na Panyarikan Desa
Ca Sedahan utawi Juru Raksa

Pawos 9

1. Sane wenang kahadegang dados Parjuru Desa Desa Pakraman gumung lwire :
 - ha. Krama ngarep muwed, sane jenek magenah, makrama Desa matata turun
sahurah-harih Desa Pakraman Gumung
 - na. Tan cedangga, sakadi peceng, perot, cungh, lan sapanunggilanipun sane
katandangin utawi kabakta saking wahu hembas ;
 - ca. Wikan mamawos kalih nyurat aksara Bali utawi Latin :
 - ra. Mabukti tan nahen malaksana corah
2. Pidabdab ngadegang Parjuru Desa Desa :
 - ha. Kakawitin antuk ngadegang prawartaka, selanturnya
prawartaka ngawentenang dudonan saseliran
Pangadegan Bendesa, Panyarikan lan Juru Raksa.
 - Na. soang soang dadia nyudi karma adiri pinaka bakalan prajuru
 - Ca. prawertaka nedunang karma sane napak wirang ngewargiang pemilihan
keliang desa mu ngemolihan suara pinih akeh sane
kaanutang ring olihan
suara sakadi ring sor :
 1. Olihan suara kapertama dados Kelihan Desa (BenDesa)

2. Olihat suara kaping kalih dados Panyarikan
 3. Olihat suara kaping tiga dados Sedahan utawi Juru Raksa
- na. Lamine madeg dados Parjuru Desa Desa, wantah limang warsa ngawit saking dina pawintenane, sejaba kapadgatakalan.
- ca. Yan sampun nahen madeg pinaka Parjuru Desa Desa, wenang kasudi malih sajroning pasamuhan Desa, malih apangadeg.
- ra. Yan wenten sinalih tunggal piwal kalaning kasudi antuk Pasamuhan Desa sang piwal punika wenang katiwakin panglokika. Yan jati tuhu paksanya, Pasamuhan Desa wenang nyudi sane sewosan

Pawos 10

Swadharmaning Parjuru Desa Desa :

1. Midabdabin Desa, krama Desa, pacang ngupadi kajagaddhitan sakala niskala, Maka darsana Awig-awig Desa, paswaran Desa, pamutus pararem Desa, nganutin sastra agama Hindu minakadi uger-uger Nagara.
2. Ngarancanayang salwiring sane nyandang pacang wangunang, sane patut hayum, manut lokika Desa kala patra. Sane mabuwat, mangda kasiddhan polih palugrahan guru wisesa.
3. Mamawosin salwiring wicara sane wetu sajroning Desa Pakraman Gumung, niwakang tatimbang, utawi pamutus babawos sane yogya kaputusang, sajroning Desa pakraman. Yan tan kasiddhan kabawosan ring Desa, Parjuru Desa Desa mituduhang mangda ngaturang ring guru wisesa mangda kabawosan.
4. Mratyaksayang, nulingayang saparipolah prajuru Desa, lwire : Kelian Banjar pakraman, Kelian Subak, keliyan Dadia miwah kelian-kelian sewoosan, Pamangu Desa, Puseh, miwah Dalem, minakadi sane sewosan sane wenten sajroning wawengkon Desa Pakraman Gumung
5. Midabdabin salwiring pamargin haci-haci ring Desa Pakraman Gumung, taler nulingayang krama Desa indike ngalaksanayang Panca yadnya
6. Parjuru Desa Desa wenang nyanggra salwiring pituduh, minakadi saraja karya saking guru wisesa, werat utawi ringan, sane yogya katiwak ring Desa Pakraman
7. Nyanggra saraja karya ri tatkala karya Agung ring Pura Besakih, salwire sane patut nyandang pacang rawuh ka Desa Pakraman
8. Pinaka dutta pacang matemuwang babawos ring sang sapisira hugi, yan pandidikan punika kapineh nyandang pacang marginin
9. Wenang ngadegang Kreta Desa, nanghing yogya kabriyukin tur kacumpuwin antuk pasamuhan Desa Pakraman Gumung
10. Wenang ngawangunang Pecalang Desa, sane patut ngalanglangin saraja karyan Desa, nulinga katreptyan sawawengkon Desa Pakraman Gumung
11. Wenang ngadegang Tukang Banten

12. Parjuru Desa Desa, Kreta Desa, Keliang Tukang Banten, patut mawinten majaya-jaya ring Pura Puseh Desa Pakraman Gumung, mungging dewasa pawintenan manut pamutus pasamuhan Desa ri tatkala ngadegang Parjuru Desa Desa inucap

Pawos 11

Phalapeksaning Parjuru Desa Desa :

1. Luput lan-lanan.
2. Wenang polih twas-twasan
3. Miwah sane sewosan manut pamutus Pasamuhan utawi pasamuhan Desa
4. Sinalih tunggil Parjuru Desa Desa sajroning sampun tutug dados Parjuru Desa Desa, polih petulung penaur pengelad saking desa manut perarem

Pawos 12

1. Indik ngadegang Tukang Banten
 - ha. Sane wenang kaadegang pinaka tukang banten inggih punika krama Desa ngarep, krama nyada utawi krama sewosan lanang wiyadin istri sane waged sajroning indik banten, kasudi antuk Parjuru Desa Desa saha kacumpuwin antuk Pasamuhan Desa
 - na. Huning mamawos saha huning nyurat aksara Bali utawi Latin

Pawos 13

Parjuru Desa Desa, miwah Tukang Banten, kagentosin utawi husan, majalaran antuk:

1. Seda ;
2. Mabukti sungkan rahat tur suwe, kantos tibanan.
3. Mapinunas sangkaning rahayu, sasampun polih lugraha
4. Majalaran tutug sengker pangadege, sajaba tukang banten
5. Sangkaning kahusanang antuk Pasamuhan utawi pasamuhan Desa

Palet 3

Indik Sangkepan Utawi Pasamuhan

Pawos 14

Mungging sangkepan utawi Paruman sajroning wawengkon Desa Pakraman Gumung, ring kadi ring sor puniki :

1. Sangkepan Parjuru Desa Desa , magenah ring Pura Puseh Gumung, wantilan Desa, wiyadin genah sewosan, sanunggil dina Anggara kasih, yan tan kasiddhan rahina punika, wanang rangkadan apanutan, teges ipun malih pitung rahina saking dina pasangkepene, utawi arahan saking Desa.
 - ha. Maka manggalaning mababawosan sajroning sangkepan, manggeh panglingsir utawi Parjuru Desa , utawi salah sinunggil Parjuru Desa saking palugrahan Klihan Desa
 - na. Pamaksan Pura, seka-seka sewosan, sane wenten sajroning Desa

Pakraman Gumung, tan kalugra ngawentenang sangkepan,
kalaning
dina pasangkepan Desa , yen prade wenten mamurug
ngawentenang sangkepan kala dina sangkepan Desa, yogya
sangkepan seke hinucap kawangdeyang

2. Indik Sangkepan

ha. Sangkepan ring Desa luih ipun :

1. Sangkepan Prajuru
2. Sangkepan Krama Desa lanang
3. Sangkepan Krama Desa istri
4. Sangkepan Seka Gong
5. Sangkepan Banjar
6. Sangkepan Truna-truna
7. Sangkepan Pecalang

na. Pamargin Pasamuhan Desa

1. Pasamuhan dados kawentenang padgatakala, manut werat wirasane sane pacang kabawosang, mawit saking pamutus babawos parareman sajroning sangkepan Desa
2. Sangkepan banjar, pamaksan pura, sekaha subak, sekaha-sekaha sewosan sane wenten sajroning Desa pakraman gumung,kawentenang manut paswara, awig-awig sowang-sowang, nanghing hugi mangda pungkuran ring sangkepan Desa

Pawos 15

Tata kramaning sangkepan wiyadin pasamuhan :

1. Saya patut makta pasayaan, tegap heteh-heteh pasayaan salwir ipun, minakadi haturan cane setegep ipun.
2. Yan kapatut pacang nganggen babanten sakabwatan, Parjuru Desa Desa, yogya mituduhang mangda cumawis, saha nyukserahang padagingan ring sang kapituduh makaryya babanten ika
3. Salah sanunggal Parjuru Desa Desa wenang nepek tetengeran ping kalih
 - ha. Kaprathama, sadurung ngawit upacara utawi maturan, pinaka pakeling mangda gelis carem
 - na. Sasampun carem, ngraris haturan punika kahantebang, mabriyuk muspa sareng sami kantos puput.
 - ca. Kaping kalih, swaran tengeran maka cihna sangkepane sampun ngawit
4. Babawosan sajroning sangkepan wiyadin pasamuhan, hugi ngupadi karahayon jagat, minakadi ngarajegang kamuruban Ida Sang Hyang Widhi, majalaran bhawa laksana manut catur dresta lwir ipun : Desa dresta, loka dresta, kuna dresta
miwah sastra dresta.

5. Yan wenten sinalih tunggal krama ngatengahang babawos, jroning sangkepan, yogya kadamyakang. Yan nyandang bawosin, yogya rinawosan. Yan tan nyandang bawosin, hantukang ring sang ngamimitin
6. Sane kinucap pamutus babawos, wiyadin paswara jroning sangkepan, minakadi pasamuhan, yan briyuk sapanggul hanut sang nyangkepin, yan tan sapunika, asing akehan wenang turut manut panglokika. Pamutus babawos yogya kalekitayang, kalaksanayang manut hangeran ipun
7. Sangkepan punika kabawos sampun puput, yan sampun nimbang hurak pagilih saya, saha sampun mabacak

Palet 4

Indik Kukul

Pawos 16

1. Sajroning wawengkon Desa Pakraman Gumung, wenten babacakan kukul kadi ring sor puniki :
 - ha. Kukul Desa kabawos Teteg –agung ;
 - na. Kukul Pura
 - ca. Kukul banjar
 - ra. Kukul sekeha-sekeha sewosan
 - ka. Kukul kubu
2. Mungging swaran kukul punika mangda mabhina-bhinayan, sawiji sowang, manut sor singgih. Yan wenten swaran kukul pateh, karun wiyadin sawer, mangda kapastika salah sawiji antuk sang madruwe
3. Nepek kukul manut Tri Brata Sandhi: Dharmma, Sima, Laksana. Teges ipun:
 - ha. Dharmma :swaran kukul maka cihna wiyadin tatenger upacara Agama wiyadin yadnya
 - na. Sima :swaran kukul maka cihna wiyadin tatenger Panca Yadnya
 - ca. Laksana :swaran kukul maka cihna wiyadin tatenger patedunan
4. Indik tetepekan kukul manut pasobhaya, kuna dresta, minakadi paswara
5. Hunggwan nepek Kukul :
 - ha. Yan nepek kukul tatenger patedunan, hugi kukul sane kadruwe antuk sekeha, krama , sane pacang tedun, ketepek antuk sang patut ngukulang
 - na. Yan nepek kukul tatenger Panca bhaya, wenang sahunggwan-hunggwan asing nampek genahe. Wenang katepek antuk sang rihinan manggihin bhaya punika, minakadi saking pituduh sang ngawiwenang
 - ca. Yan nepek kukul tatenger upacara Agama, Dewa yadnya, Bhuta yadnya, Manusa yadnya , Pitra yadnya, wenang kukul sane wenten ring swang-swang genah upacarane. Yan nyelang kukul sewosan patut wenten patut wenten palugrahan sang ngawiwenang
 - ra. Yan kalaning ngalungayang Bhatara, mendak Bhatara, Bhatara turun kabeh, kalaning pacaruan Desa, sami kulkule sajroning Desa dados swara yang , tetepekan manut krama.

- ka. Yan wenten sinalih tunggil mamurug, nepek kulkul tan manut krama, yogya kabawosan antuk Parjuru Desa Desa, katiwakin panglokika, saha pamidandha manut paswara.

Palet 5

Padruweyan Desa Pakraman Gumung

Pawos 17

Sane kadruwe antuk Desa Pakraman gumung, lwire :

1. Pura Kahyangan Tiga :
 - ha. Pura Desa utawi Pura Bale Agung Gumung
 - na. Pura Puseh Gumung
 - ca. Pura Dalem
 - ra. Pura Prajapati, Penguluning setra
2. Pura Panyimpenan
3. Pura Melanting
4. Palemahan sane kaanggen karang pomahan, miwah tlajakan karang
5. Palemahan sane kaanggen setra pakraman
6. Palemahan sane kaanggen margi, rurung-rurung, basang tlabah sajroning Desa Pakraman Gumung
7. Banjar-banjar pakraman sane wenten sajroning Desa Pakraman Gumung
8. Karang suwung sane wenten sajroning Desa Pakraman Gumung
9. Lembaga Perkriditan Desa (LPD)
10. CBD
11. Carik lan Tegal

Pawos 18

Piolih-olihan Desa Pakraman Gumung

- ha. Urunan, panahub, pakenin-kenin pakaryan krama Desa
- na. Haturan, dana, punia
- ca. Kontrak tanah Desa, carik
- ra. Pasabuhan saking pengusaha
- ka. Piolih sane sios-siosan

Palet 6

L a l u p u t a n

Pawos 19

1. Luput lan-lanan punika mateges tan keni pamijilan lan-lanan salwiripun ritatkala Desa Pakraman Gumung ngangkat karyya krama Desa. Sapunika taler ritatkala ngaci-aci salwire sane dados hemponan krama Desa sareng sami
2. Sane luput lan-lanan, lwire :
 - ha. Parjuru Desa Desa
 - na. Pamangku Desa
 - ca. Krama sane nglaga

- ra. Saya Perantenan lan Saya Tungguh
- ka. Sang sungkan tahunan
- da. Sang cedangga banget
- ta. Wong alit ubuh
- sa. Sang sapisira hugi sane kalugra antuk Parjuru Desa Desa, manut pararem

Palet 7

Indik Dadosan Patedunan

Pawos 20

Dadosan patedunan, sangkepan, tedun makaryya miwah sane sewosan, nganutang sukreta sowang-sowang, lwire :

1. Yan Parjuru Desa Desa madruwe patedunane, yogya nganggen sukretan Desa,sane kagaduh antuk Parjuru Desa Desa, dadosan ngaranjing ka Desa
2. Yan babanjaran madruwe patedunane, yogya ngangge sukretan banjar sowing-sowang sane sampun kagaduh antuk banjar pakraman punika, dadosane ngaranjing ka banjar pakraman
3. Yan subak madruwe patedunane,yogya nganggen sukretan subak, sane sampun kagaduh antuk subak sowing-sowang, dadosane ngranjing ka subak
4. Yan seka-seka sewosan madruwe patedunane, yogya nganggen uger seka sowing-sowang, dadosane ngranjing ka seka
5. Yan wenten krama sinalih tunggal tan tinut ring tatepasan miwah dadosan punika, wenang babawose katengahang ka Desa,Parjuru Desa Desa yogya mamawosin

Palet 8

Indik Bhaya

Pawos 21

1. Sane kinucap Panca –bhaya, lwiripun : Jiwa bhaya, Aghni bhaya, Toya bhaya, Artha bhaya, Bhayu bhaya
2. Salwiring bhaya wenang gegerak antuk swaran kulkul.
3. Sang sapisira hugi krama Desa sane manggihin, wyadin huning ring panangkaning bhaya ring sang katiben bhaya, wenang ngegerak nepek kulkul manut indik kakulkullan bhaya, raris damyakang ring waDesa
4. Ri kala wenten swaran kulkul bulus tatenger bhaya, krama Desa patut yatna, sayaga, saha sregep ngamong prabot wiyadin gagawan sowang-sowang
5. Yan sampun tatas ring bhaya punika, krama Desa patut matulung nambakin wiyadin ngamesehin bhaya punika, manut hunggwan, kalih manut patuduh sang yogya ngawiwenangang
6. Sang sapisora hugi tan kawasa majajabur ri kalaning Desa, krama Desa, katiben bhaya. Yan wenten sinalih tunggal kacirenan mamurug, yogya katengahang ka Desas, wiyadin katurt ring sang amawa bhumi, mangda kabawosan
7. Yan pinganan bhaya punika sampun kapineh nahnah, tan pacang nyengkalen, wenang kacihnayang antuk swaran kulkul lambat atuludan,wiyadin pasiyar saking sang ngawiwenangang

Palet 9

Indik Rarampagan

Pawos 22

Sane wenang rampage, lwire : taru sane mabuwat pacang mänge wawangunan ring pura-pura panyiwian Desa sane wenten sajroning tanah druwen Desa utawi duwen krame desa , raramon ron, busung, hambu, sahang, bungkak rikala Desa wiyadin banjar maduwe karya manut dresta. Hunggwan kalih pidabdab ngarampag, mungguh sajroning pararem Desa Pakraman Gumung

Palet 10

Panyanggran Banjar, Krama Desa

Pawos 23

1. Saraja karyyan Banjar kasanggra antuk krama banjar sowang-sowang, kahunadikayang antuk klian banjar.
2. Saraja karyya Desa, kasanggra antuk krama Desa, kahunadikayang antuk Parjuru Desa Desa, karembe antuk kelian-kelian banjar

CATURTA SARGAH

SUKERTA TATA PALEMAHAN

Palet 1

Indik Tegal, Bangket, lan Karang

Pawos 24

1. Palemahan Desa Pakraman Gumung , mahuger antuk Tri-Mandala, lwire :
 - ha. Utama mandhala : palemahan sane kaanggen karang pura, wiyadin parhyangan
 - na. Madhya mandala : palemahan sane kaanggen karang pomahan, genah wawangunan, sakadi : banjar, sekolah, kantor, klinik, miwah sane sewosan
 - ca. Nista mandala : palemahan sane kaanggen setra, margi, rurung, tlabah, papunduk, tulak tanggul, miwah sane sewosan.
 - ra. Sahanan palemahan sane wenten ring wawengkon Desa Pakraman Gumung
,yogya mangda madruwe babaledan wiyadin wates sane pasti.
2. Sahanan palemahan punika, hugi mangda madruwe marggi, rurung, papunduk sane dados hentasin
3. Yan wenten pakarangan pura, pomahan, tegal, carik, miwah palemahan sewosan kabebeng tan madruwe marggi, rurung, miwah papunduk, sang madruwe patut ngatengahang babawose ka Desa. Parjuru Desa Desa yogya negdeg, ngutsahayang mangda polih marggi malarapan sami suka. Yan patut matumbas, manut pangargan tanah sane kamanggehang antuk sang mawa rat, sami katahur antuk sang mamuatang
4. Yan Desa pacang ngalinggahang marggi, rurung, minakadi makarya marggi, rurung Desa, saking sampun hingkup paswaran Desa sareng sang madruwe tanahe,

- yan nganggen tegal, carik, miwah palemahan sewosan wenang tan nahur pangargan tanah punika. Nanghing yan madaging tatanduran, papayon, wawangunan salwire, Desa patut ngicen prabeya agung alit manut pamutus parembug Desa kala punika.
5. Sahananing karang pomahan hugi mangda masengker. Pidabdab nyengker magaleng ka dulu. Panyengker sane sisikangin, miwah sisi kaler, patut kakaryanin antuk sang ngenahin karang punika. Sajaba karang ngele, wiyadin lingkehin rurung, palemahan suwung. Yan babaledan bangket hugi magaleng ka teben
 6. Sang sapasira hugi ngenahin karang tegehan, patut naku, tegehe asukat natah dangsah, sane tebenan, wenang nyusunin tembok.
 7. Telajikan karang patut kapiyara antuk sang ngenahin karang punika sowang-sowang, mangda mapikenoh tur kanten hasri
 8. Yan wenten sinalih tunggal nyadya nyaleksek wiyadi ngaleklek babaledan, salwiring babaledan wiyadin wawatesan, lwire : babaledan wiyadin wates pura, karang pomahan, carik, tegal, setra, tlabah, jlinjing, margi, rurung, papunduk, miwah sane sewosan, yogya katiwakin danda manut werat ringan kahiwangane, saha mahayu sane kasaleksek wiyadin kaleklek, kalih mrayascitta saka bwatan sane nyandang katibanan panyangaskara.
 9. Yan hana sinalih tunggal ngaletihin, ngarucakin, ngarobedin, ngararabin, palemahan liwaring pomahan padruweyan nyane, lwire : ngutang luhu, bangkaan, miwah salwiripun, nyorongang babanyon, yogya katiwakin danda gung artha manut pararem, mahayu sane kaletahan, karucakan, karobedan, raraban hinucap ring hajeng, saha mrayascitta sane nyandang keni panyangaskara.
 10. Yan wenten anak ngenahin palemahan sajroning wawengkon Desa Pakraman Gumung
tan tinut makrama Desa nganutin Awig-awig miwah pararem Desa, tan kalugra nganggen salwiring padruweyan Desa, tan kalugra ngalaksanayang Panca yadnya sajroning Desa Pakraman Gumung. Yan tekaning kapatiyan dados sahubang utawi pendem ring setra pangilang-ilangan. Tan polih panyanggran krama banjar minakadi panyanggran Desa
 11. Yan wenten anak tan maagama Hindu ngenahin palemahan sajroning Desa Pakraman Gumung, patut nganutin Paswaran Desa Pakraman Gumung

Palet 2

Indik Kakayonan

Pawos 25

1. Tan kalugra nebtob, ngarebah, wit-witan salwiripun, ring palasan, pategealan, habing, tangkid miwah genahe sewosan sane padruen desa tur kakeker antuk Desa. Yan wenten sinalih tunggal mamurug, katiwakin dandha manut lokika sajroning Pasamuhan Desa, tur taru sane karebah mantuk ka Desa
2. Yan wenten wit-witan wiyadin kakayonan ngungkulin palemahan anak sewos, sane ngawinang tiyeb, tampus, ngarobedin, asing kungkulan wenang ngatengahang ka Desa, Parjuru Desa Desa maritetes saha mituduhang sang

- madruwe mangda ngrancap, nekteb, wiyadin ngarebah. Yan kantos ping tiga pituduh Desane tan kalingu, wenang katiwakin dandha sang anikel tuduh, gung artha manut paswara. Kakayonan punika prasiddha karebah antuk Desa
3. Tanem tuwuh jroning karang pomahan, tan kalugra tegeh ipun lintangan ring jan palit solas, wiyadin limang meter. Bungkil ipun adepa agung wiyadin kalih meter tengah, saking panyengkere ngajrowang. Yan mamurug, wenten raris ngatengahang ka Desa, yogya sang madruwe katiwakin dandha gung artha manut paswara, saha ngarebah, sajroning pitung rahina saking pamuput babawose
 4. Kakayonan jroning karang pomahan hugi mapyara mangda tan ngaletihin, ngarobedin, mamayen karang sewosan, saking akah kantos dawun ipun. Yan wenten mamurug, tan tulinga ring kakayonan duwe, wenten ngatengahang ka Desa, Parjuru Desa Desa yogya maritetes, saha nepasin manut panglokika kalih paswaran Desa.
 5. Yan wenten wit taru mentik kantos ageng ring babaledan, wates, salwiring babaledan mwang wates, wenten ngatengahang ka Desa, patut taru punika karebah, raris pinara tiga, apahtigayan mantuk ka Desa, sang madruwe babaledan apahtigayan sowang-sowang.
 6. Yan wenten sinalih tunggal nundungin tanem tuwuh, kakayonan, sane kaswatah pacang mamayen, wenang kabawosang ring sang madruwe. Yan hakas sang madruwe, yogya katengahang ka Desa. Parjuru Desa Desa negdeg tanem tuwuh wiyadin kakayonan punika. Yan manut panglokikan Parjuru Desa Desa yogya tundungin, taler hakas sang madruwe, patut sepat gantungin. Yan jati kadi panywatahe, yogya sajroning pitung dina, karebah picundangan. Sang madruwe katiwakin dandha gung artha manut pararem, dosane anikel tuduh. Yan tan yukti kadi panarkane, sang ngatengahang katiwakin dandha gung artha manut pararem, dosane angadakaken nora, tanem tuwuh wiyadin kakayonan punika tan karebah.
 7. Yan wenten sinalih tunggal nyadya nandur pijer, turus, salwiring tanem tuwuh wiyadin kakayonan sane pacang dados ageng, nesek ring babaledan, ring wates papunduk, hugi mangda masupeksa ring Parjuru Desa Desa, kalih ring panyanding sowang-sowang. Yan tan kalugra, tan kapisukayang, pradene taler kapurug, yogya sang mamurug katiwakin dandha gung artha manut pararem, tur ngamademang tatandurane
 8. Yan wenten krama nandur pijer, poh, miwah salwiring tatanduran sane tuwuh ipun lintang ring limang warsa, hugi mangda makaryya pasobaya ring sang madruwe tegal hinucap. Yan durung pinganan mawoh tubuh minakadi tatandurane sewosan punika, durung nahen ngalapin who ipun, raris kajabutin, yogya sang madruwe tegal nahur panjala sa wit-sa wit, gung artha manut pasobhaya, wiayadin pamutus Parjuru Desa
 9. Sang sapasira hugi nyakap tegal, tan kawasa ngarebah tanem tuwuh sane dados anggen lakar wawangunan, tatandurane sane matuwuh lintangan ring limang warsa, yan tan polih lugra saking sang madruwe tegal punika

10. Yan wenten wit-witan sajroning pategalan, rebah sangkaning kapancabhaya, tan dados kajarahin antuk sang sapisira hugi

Palet 3

Indik Wawangunan

Pawos 26

1. Sang sapisira hugi krama Desa, sawawengkon Desa Pakraman Gumung, yan pacang ngawangun panyengker karang pomahan, patut masupeksa ring panyandinge. Yan tan radin, yogya nunas degdegan ring Parjuru Desa Desa. Parjuru Desa Desa negdeg sadu hajeng sang mawiwara saha ngicen tatepasan
2. Wawangunan ring palemahan pecak carik, tegal, palemahan suwung, sane sampun masanggah pawon, palemahan punika prasadha kabawos karang pomahan, dwaning sampun katiwakin pangupakaran karang. Awanan patut madruwe rurung betel ka marggi agung, sukat dados pacang ngalintangang papaga, dwaning tan patut nglintangang sawa ring carik miwah tegal. Yan wenten mamurug, yogya Parjuru Desa Desa niwakang tatepasan mangda sang mamurug mrayascitta palemahan hinucap sane kalintangin
3. Yan tan masanggah panghuluning karang, kabawos akakubon. Tan yogya genah angraksa sawa. Yan wenten mamurug, yogya katiwakin pamidandha mangda mrayascitta palemahan punika
4. Yan wenten sinalih tunggal sang sapisira hugi, pacang ngawangun wawangunan genah ngalaksanayang upacara Agama, lwire: Pura, Masjid, Gereja, Wihara, miwah sane sewosan, hugi mangda wenten lekita palugrahan Parjuru Desa Desa, kalih lekika palugrahan Guru Wisesa. Yan wenten mamurug kadi kinucap ring hajeng, kabawos tan siddha karya, tan wenang anggenen, tur wawangunan punika yogya wangdeyang
5. Wawangunan jroning karang pomahan, hugi nganutin Tri Mandhala. Utama Mandhala, sanggar panghuluning karang. Madhya Mandhala, pagenahan mapumahan. Nista Mandhala, ngaran lebu, jabayan.
6. Tan wenang ngungkulang capcapan wawangunan ka jroning karang pomahan sewosan tani druwe. Yan wenten mamurug, wenten ngatengahang ka Desa, yogya Parjuru Desa Desa negdeg, saha nyipat gantungin. Yan jati lintang, jroning selahe rahina saking puput babawose mangda sampun kapastika
7. Tan wenang nganggen tembok umah wiayadin tembok panyengker tan druwe. wenang ya kasambatsara antuk sang madruwe. Yan hakas tur mamurug sang kasambat sara, yogya katengahang ka Desa, kabawosan antuk Parjuru Desa Desa.
8. Sang apasira hugi pacang mapawangun nepi ring marggi agung, nepi ring rurung Desa, yogya wenten lekita palugrahan saking Parjuru Desa Desa, wiyadin lekita palugraha sang amawa rat. Yan tan polih lekita palugrahan, padgatakalan wawangunan punika dados katundung tan ngetang prabeyan tatundungan.
9. Sang sapisira hugi krama Desa ngawengku karang pomahan, yogya hurati myara kahasriyan lebu pakaranganya, rurung pentasan pinih sor asukat karangnya ngalajur

Palet 4

Indik Wawalungan

Pawos 27

1. Sane kinucap wawalungan, sakancvan buron suku- patsane nyadya kapyara, sakadi, bawi, banteng, kebo, misa, jaran miwah sapanunggilan ipun. Taler watek makampid, sane nyadya kapyara, skadi, ayam, itik, hangsa, dolong, miwah sabacakan ipun.
2. Sang sapasira hugi krama Desa sane myara wawalungan suku pat, sajaba hasu, tan wenang ngalumbar. Sane patut matlusuk, mangda matlusuk. Sane tan patut matlusuk mangda mategul bawong. Sane patut maglogor, makandang, hugi mangda maglogor wiyadin makandang. Mangda tan ngarucakin, ngaletihin palemahan tan druwe, miwah mamayen krama Desa, jana pada. Yan hasu mangda mabelat, lwire makalung bawong, maka cihna wenten sane myara.
3. Sang sapasira hugi krama Desa, myara watek suku kalih, watek makampid, yatnain hugi, mangda tan banget ngarucakin, ngaletihin, palemahan, pomahan, tatanduran druwen anak sewos.
4. Tan wenang ngangonang, negulang, hingon-hingon ubuh-ubuhan, ring palemahan tan druwe, minakadi tan sasakapan druwe, yan tan kapisukayang. Sang madruwe palemahan, Parjuru Desa Desa, langlang Desa, kliyang-kliyang, asing mamanggihin, wenang nyambatsara sang madruwe wawalungan ika. Yan hakas sang kasambatsara, wawalungan ika wenang taban. Parjuru Desa Desa yogya niwakang pamidandha, manut lokika, gung artha manut pamutus prarem.
5. Tan wenang ngangonang, negulang ubuh-ubuhan, ring palemahan karang pura, kahyangan salwir ipun, minakadi setra, rurung, papunduk, marggi, tlajakan ring hajeng, palemahan sane kapingitang, karang suwung, miwah sabacakan ipun. Yan wenten mamurug, sang madruwe palemahan, Parjuru Desa Desa, langlang Desa, kliyang-kliyang banjar, prajuru Desa sinalih tunggal, asing mamanggihin, wenang nyambatsara, saha naban wawalungan ika. Katengahang ka Desa, katiwakin dandha gung artha manut paswara, saha mahayu yan wenten karusak, tur mrayascitta palemahan ika sane nyandang prayascitta manut panglokika.
6. Yan wenten maubuh-ubuhan sajroning karang pomahan hugi tlajan mratyaksayang kandang ipun, mangda tan ngawetuang bhaya, panyungkan. Taler mangda hapik, guriten, siksa, mangda tan ngantos ngaletihin, ngarobedin, crobo karang pomahan wiyadin palemahan panyandinge. Yan wenten mamurug, tan siksa ring hingon-hingon, miwah kandang ipun, wenang panyandinge nyambatsara, wenang katengahang ka Desa. Parjuru Desa Desa nepasin. Wenang katiwakin dandgha manut panglokika kalih paswaran Desa.
7. Sang sapasira hugi krama Desa , ngawangunang kandang wawalungan , buwat adol atuku, yan kandang ayam, itik, miwah sapanunggilan ipun, buwat naluhang, miwah atul atuku, dagingin seket ukud. Yan kandang wawalungan suku pat, dagingin Limang ukud, sowang-sowang, ika wenang jroning karang pomahan. Yan lintangan ring punika daging kandise, tan wenang wangunang jroning karang pomahan, yogya kawangunang ring palemahan sane mawaneng sa sor ipun satus depa saking palemahan karang pomahan, sekolah, kantor, pura,

- kahyangan, minakadi genah sane kakeker wiyadin kapingitang antuk Desa Pakraman Gumung tur mangda madruwe lekita palugrahan saking sang amawa bhumi.
8. Yan wenten wawalungan ngarucakin, ngarug tatanduran, wenang taban. Sang madruwe tatanduran ngatengahang ka Desa pramangkin, kabawosan antuk Parjuru Desa Desa, sha katiwakin dandha manut lokika pararem Desa.
 9. Yan godel banteng, godel kebo, godel misa, durung matlusuk, godel jaran utawi bebedag, kambing, miwah sabacakan ipun, durung hantes mategul, Wenang kekaryanang glogor.
 10. Yan bebek, dolong, hangsa, ayam miwah sapanunggilan ipun, ngarucakin tatanduran, taler wenang taban. Indike naban mangda masaksi, saha kasupeksayang ka Desa pramangkin, Parjuru Desa Desa yogya mamawosin niwakang pamidanda manut panglokika.
 11. Yan wenten wawalungan ngeleb, mamegat, ngranjingin palemahan pura, kahyangan, setra, karang pomahan, miwah sane sewosan, lokikanen juga. Yan tan nyadya kalebang, tan yogya taban, wenang salabarang ring sang madruwe. Yan nyadya ka lebang, wenang taban, tur katengahang ka Desa
 12. Sang sapisira hugi krama Desa Pakraman Gumung tan kalugra nyorongang babanyon laleteh kandang wawalungan ka tlabah, jalingjing, rurung sane wenten sajroning Desa Pakraman Gumung. Yan wenten mamurug, katiwakin dandha antuk Desa gung artha manut lokika, saha pararem Desa. Tur sajroning pitung rahina saking pamuput babawose, salantur ipun tan kari sorong laleteh miwah babanyon punika.
 13. Sang sapisira hugi ngarereh hulam ring tukade, ring segarane, ring tlabah, ring jlingjinge miwah sahunggwaning hulam sajroning Desa Pakraman Gumung, tan wenang nganggen tuba miwah listrik salwir ipun, tan wenang ngarusak hempelan, nguhukang tamuku, Wiadin medil paksi, yan wenten mamurug, wenang katiwakin dandha gung artha manut lokika saha pararem Desa, tur mahayu sane karusakang
 14. Sakancan dadandhan, dadosan, sane mungguh ring hajeng, sami mantuk ka Desa Pakraman Gumung.

PANCAMA SARGGAH

SUKERTA TATA AGAMA

Palet 1

Indik Dewa Yadnya

Ka ping 1

Indik Kahyangan

Pawos 28

1. Pura Puseh Gumung, Pura Bale Agung, Pura Dalem, Pura Panyimpenan,, Pura Prajapati, Pura Melanting kahemponin antok Desa, indik pangaci-aci manut kuna dresta gagadhuan kalih pamutus pararem Desa Pakraman Gumung
2. Pura Hulun Suwi miwah Hulun Subak, papayon kalih pangaci-aci kahemponin antuk krama Desa sane nyungsung Bhatara ring Hulun Suwi miwah Hulun Subak punika sowang-sowang
3. Yan wenten karecehan, wicara sajroning Pura, kahyangan ,wenang katengahang ka Desa, Parjuru Desa Desa, mamawosin, nyahsahang, nepasin wicarane, mangda kasiddhan mawali landuh jati mula
4. Yan wenten pura kahyangan sinalih tunggal, reneng pangaci-acinya, kantos kadasa warsan, yoga Parjuru Desa Desa mamawosin, maritetes, ngutsahayang mangda kasiddhan mawali kadi jati mula. Nanghing prade tan kasiddhan, majalaran antuk pamutus pasamuhan Desa, prasidha Desa ngawangunang pangupacara mralina Pura punika, mangda tan karanjingan kaumahan antuk Ki Bhuta Kubandha

Ka ping 2

Indik Pangaci-aci

Pawos 29

1. Indik pangaci-aci,ring Pura Kahyangan sane wenten sajroning wawengkon Desa Pakraman Gumung, kahamongin antuk krama Desa, Sowang-sowang pura madruwe gagaduhan, pinaka huger pangaci-aci, miwah babanten.
2. Sane yoga muput aci-aci punika, sulinggih sane katuhur antuk krama Pura sowang-sowang, minakadi Pamangku Pura ring Pura hinucap.
3. Pura Desa, punika wantah pamangku Pura Puseh, Pura Dalem, Pura Desa, sane wenten sajroning Desa Pakraman Gumung, kalugra nganteb banten pangodal minakadi sane sewosan ring pura-pura sawewengkon Desa Pakraman Gumung sane mamuwatang, taler manut kawenangan Pamangku
4. Ritatkala Desa ngawangun karya Tabuh gentuh, Bhatara Turun Kabeh, minakadi karya agung sawosan, Desa wenang nyarad pamangku-pamangku kahyangan sakatahe pacang ngarembo pamangku Desa

Pawos 30

1. Indik pangaci-aci ring pura Pamrajan, Pahibon, Dadya, punika kahemongin antuk krama Desa sajroning seka Dadya, Pamrajan, manut sima drestanya sowang, tan singsal ring ucaping sastra Agama Hindu
2. Ri tatkala Bhatara turun kabeh, makiyis, Pamrajan, Pahibon, Dadya, tan sareng ngalungayang Bhatara, nanghing hugi mangda ngiyas pura saha ngadegang Bhatara utawi nyejer

Pawos 31

1. Carik ring Desa Pakraman Gumung kahaci-hacinin antuk Desa. Dina pangaci kalih babanten manut dresta

Pawos 32

Aci-aci, piodalan, usabha, pasegeh ring Kahyangan Desa, Iwire :

- Pura Puseh, kala Purnama Kelima
- Pura Penyimpanan, Budha Kliwon Pahang
- Pura Dalem Pangulun Setra, Sasih Kesanga sinunggil Kalih Warsa
- Pura Melanting, Rahina Soma Ribek
- Nyugimanek, Rahine sugimanek bali
- Pepranian, Rahina Kuningan

ha. Aci-aci kasanggra antuk krama Desa

na. Lwiring babanten, minakadi heed upacara, manut gagaduhan dresta kuna sowang-sowang pura

ca. Padagingan pacang aci-aci :

- Paturunan utawi wawijilan krama Desa
- Kas Desa pakraman Gumung
- Pioli-oli pagunakayan krama Desa
- Haturan-haturan sangkaning krama suka nirmala

ra. Pangaci sane masuksma pangayu-ayu ring Pura Ulun Suwi utawi Bedugul nunas kalanduhan, mupu sarwa tinandur utamine ring

carik kemargiang manut Pemutus subak ;

- Neduh Nguning ring Pura Kahyangan Tiga nemu kajeng utawi kajeng kliwon
- Mabyukukung manut tetanduran Neduh nemoning kajeng kliwon

ka. Pasegeh tunggil kajeng kliwon, purnama tilem, kasanggra antuk pamangku sowang-sowang. Padagingan saking druwe pura, kahantebang antuk pamangku pura sowang-sowang

da. Sane muput salwiring haci-haci ring Pura Kahyangan Tiga Desa miwah sapanunggilan ipun wantah Pemangku pura sowang-sowang, sejabaning melaspas palinggih Ida Sulinggih sane muput, katuhur antuk Desa, kasanggra antuk Pemangku Desa

ta. Ri kala kabrebehan jagate, kagringan, katiben panca- bhaya, pinganan tan mresiddhayang ngaturang haci kadi patute, yogya Parjuru Desa Desa miwah pamangku, ngaturang pihuning ring Bhatara, masadhana babanten padhatengan, pacanangan, maka cihna tan pegat haci-hacine. Ri wus mawali degdeg jagate, patut ngawangunang upacara Bhatara Turun Kabeh, masasirih makakobok ka segara giri

wa. Yan ritatkala mamahayu, ngayum papayon, ring pura-pura kahyangan, pinganan tan puput kala dinaning piodalan, pangacine wenang

rangkadang, nanghing padhatengan, pacanangan, tan dados pegatang. Ri wus puput masasapuh salwire, mawali kadi kuna

Ka ping 3

Indik Pamangku

Pawos 33

1. Pidabdab ngadegang pamangku ;
 - ha. Ngambil saking saserod Santana wiyadin katurunan
 - na. Saking pamuwus sasemburan, wiyadin nyanjan, sasampun pinih kidik kantos ping tiga
 - ca. Sangkaning kajujuh saha kabriyukin antuk krama Desa Pakraman Gumung
2. Sang sapasira hugi pinaka jan banggul pamangku ring Pura-pura Kahyangan Desa Gumung, mangda pageh ngamel kalih ngalaksanayang sasanan Pamangku.
3. Sang sapasira hugi krama Desa, sangkaning saserod, sangkaning kasenengan antuk Bhatara polih pamuwus ring sasemburan, minakadi kajujuh kabriyukin antuk krama Desa, pacang kaanggen pamangku, yan kari alaki rabi yogya lanang istri mawinten.
4. Sang kasudi pacang kaanggen pamangku, patut mawinten ring Pura genahe dados jan banggul, mungging prabeya kasandangin antuk Desa utawi pamaksan, dadia sowang –sowang
5. Sinalih tunggal pamangku yan katekan pati, patut polih prabeya atiwa-tiwa patulung marupa beras yogya polih 150 Kg lan kain agulung lanang istri
6. Tuwas-tuwasan pamangku, mungguh jroning gagaduhan pamutus pararem Desa, taler nganutin dresta kuna.
7. Pamangku kagentosin majalaran antuk :
 - ha. Mapinunas mararyyan, saking patut pinunase, nanghing tan kari ngalaksanayang dharmaning Pamangku
 - na. Saking patut pinunase, majalaran antuk lingsir, sampun tan mampuh, sungkan rahat tan kengin waras, kanyadayang antuk krama pura, wiyadin Desa. Kawekas kalaning seda, patut polih patulung atiwa-tiwa marupa beras beras 150 Kg lan kain agulung lanang istri.
 - ca. Sangkaning kahusanang, majalaran antuk laksana mamurug sasanan Pamangku. Kawekas kalaning seda tan polih patulung prabeya atiwa-tiwa.

Ka ping 4

Indik Sukretan Pura Kahyangan

Pawos 34

1. Ri kalaning maturan hamung Pamangku ring kahyangan punika sane dados mungguh tedun ring palinggih-palinggih pura kahyangan hinucap, minakadi sang sampun polih lugraha saking Parjuru Desa Desa. Yan wenten mamurug, katiwakan dandha mrayascitta palinggih punika
2. Pamangku sane patut ngantebang babanten ring Pura, wantah pamangku sane kadruwe antuk Pura punika. Yan nenten wenten pamangku ring Pura punika,

- utawi kapyalang, dados nyarad Pamangku sewosan, sakeng palugrahan Parjuru
Desa Desa
3. Tan kalugra masumpah, macoran, sajroning pura kahyangan sinalih tunggal, sajaba sangkaning wicaran pura hinucap, taler saking pabuwat krama Desa sane ngempon pura punika
 4. Tan kalugra wak capala, hasta capala, pada capala, miwah sapanunggilan ipun, sajroning Pura Kahyangan. Yan macihna wenten mamurug, wenten raris ngatengahang ka Desa, yogya tiniwakin dandha pamarisuddha n kahyangan
 5. Tan kalugra malaksana kantos ngawetuang byota ring pura Kahyangan, minakadi: majajal/magerengan bilih-bilih yan jantos kanin/metu rah, yogya tiniwakin dandha gung artha manut pangarggan beras 100 Kg kang sawiji, saha marisudha kahyangan punika
 6. Tan kalugra maprawrerti ala sakadi : makoratan, mawarih, masanggama miwah ala sewosan ring pura kahyangan, yogya tiniwakan dandha gung artha manut pangarggan beras 25 Kg saha marisudha kahyangan punika
 7. Kramane sane manggihin utawi uning mungging wenten jadma ngaletihin kahyangan kadi mungging ring ajeng, patut atur uning ring prajuru; prade tan wenten nyadokang wenang kasisipang sinanggah saruron ring corah.
 8. Sang sapasira hugi kacuntakan, salwiring cuntaka, yan durung mabresih, tan kalugra ngaranjing ka Pura Kahyangan. Yan katenger wenten mamurug, yogya tiniwakin dandha marisudhha kahyangan punika.
 9. Tan kalugra ngawentenang kalecan, jajuden, sajabaning tabuh rah sajroning utama mandala, Madhya mandala pura Kahyangan.
Yan wenten mamurug, sang ngalaksanayang katur ring sang amawa rat, tur kaklecan jajuden punika kawangdeyang
 10. Tan kalugra makta salwiring sane kasinanggah tan suci ngaranjing ka jroning panyenger Pura Kahyangan. Yan wenten mamurug yogya sang mamurug marisuddha Pura punika
 11. Sang sapasira hugi rikalaning makemit, ring Pura Kahyangan ,yan merem tan kalugra madukan lanang istri, sajaba anak kapineh kari alit durung bajang, teruna.
Yan mamurug keni danda manut pangarggan beras 10 Kg kang sadiri tur mrayascita pura punika
 12. Pamaksan sowang –sowang Pura Kahyangan sawawengkoning Desa Pakraman Gumung kalugra madruwe sukreta ndiri-ndiri nanghing tan dados singsal ring
Awig-awig Desa Pakraman Gumung
 13. Pura Kahyangan tan wenang anggen, sajaba ngalaksanayang upacara Agama Hindu. Yan wenten mabukti mamurug, sang malaksana kawangdeyang tur kapakardhinane kapuceh
 14. Yan wenten macihna anak wiyadin sang sapasira hugi, katedunan utawi kapangluh sajroning pura kahyangan sawawengkoning Desa Pakraman Gumung, mamababawos minangkenang Ida Ratu Sesuhunan utawi Bhatara, di gelis tunasang tirtha laluputan mangda gelis hudep. Prade sampun kakatisin tirtha, kantung ngatemel masera masero, ngawetuang sumandeya kayun kramane, irika

15.patut pintonin. Indike mintonin, ambilang toya apane, celebang liman nyane makakalih. Yan mabhukti tan belus, nyandang gega pangandikan Bhatara. Yan pade belus, tan nyandang gega, gelisang gingsirang genahang mangda doh sakingpura punika===

Ka ping 5

Indik Cuntaka miwah Sosot

Pawos 35

1. Sang sapasira hugi krama Desa , sane kahanan cuntaka, tan wenang ngeranjing ka Pura Kahyangan
2. Lwir sane kinucap cuntaka :
 - ha. Anak istri kalaning ngrajaswala, suwen cuntakane,saking ngawit ngrajaswala, kantos nyat, macihna sampun mabresih
 - na. Sang nganten lanang istri, suwene cuntaka, ngawit saking rahina pangantenane, wiyadin marangkate, kantos puput mabyakawon, saha samayut prayascita, malukat matirtha
 - ca. Rama rena cuntaka sangkaning madruwe oka. Sane lanang cuntaka suwene roras rahina saking hembas anake alit,kantos hudel nyane. Sane istri pinaka rena cuntaka petang dasa kalih dina saking wawu hembas rarene
 - ra Yan anak istri karuron, cuntaka pateh ring ngembasang oka. Rabine cuntaka roras dina
 - ka Anak alit punika sadurung aweton durung dados ngeranjing ke pura kahyangan desa.
3. Cuntaka malarapan antuk kasedayan, kapatiyan :
 - ha. Yan sang ngarepin, minakadi sang magenah sajroning karang pomahan sang seda, suwene cuntaka, saking wawu seda kantos puput panglemek karyyane. Punah cuntakane antuk mararebu, malukat.
 - na. Sang madruwe kasedayan kacuntakan :
 1. Tigang rahina prade kapendem, ngawit saking ngurugin rahuning nabuhin. Sadurung nabuhin lanang wadon sang maduwe kapademan luput ayah-ayahan, papeson miwah lanlanan
 2. Petang dasa kalih rahina prade sang kapendem ngadut manik, anak madruwe oka, naghing okane durung kepus hudel, sane kapendem sawan rare durung tutug kambuhan
 3. Pitung rahina prade ngaben, saking ngulapin ngantos panglemekan, ngraris mararebu
 4. Tigang rahina prade kasedayan rare durung maketus, saking nabuhin
 - ca, Sang polih, ngarap sawa, ngamel saha ngarembat saheteh-ete upakara pula- palining sawa liwaring Desa Pakraman Gumung, cuntaka adina,punah cuntakane macihnayang antuk mabresih malukat
 - ra. Yan sang manjing mijil ring umah sang ngraksa sawa, sasuwen sawa wiyadin layone karaksa, pateh cuntakane kadi sang ngarepin sawa

ika,luwih yan tunggil siddhikara, pateh cuntakane kadi sang ngarepin sawa ika

- ka. Yan sang polih nyembah, mangan paridan sawa, punika taler kabawos cuntaka, suwene cuntaka kantos masiram mabersih
4. Cuntaka sangkaning malaksana mamitra ngalang, suwene cuntuka salami sadurung malukat/maprayascitta
 5. Anak wetu sangkaning smara dudu utawi tan pawidhi widhana pawiwahan, babinjat, punika taler cuntaka. Suwene cuntaka, salamine during wenten meras, wiyadin nuduk ngangkenin piyanak, utawi nganggen dadaman
 6. Cuntaka sangkaning mabhukti madruwe panyungkan sane tan siddha waras salamine, kadi angganing hila, buduh, ngawijilang reged saking silit, bhaga purus,tan henap mameres, brung borok tahunan mabanyeh, miwah salwir punika Suwene cuntaka, salamine tan waras
 7. Yan wenten sinalih tunggal sang cuntaka antuk ngaraksa sawa wiyadin layon, mamanah utawi mapakayun ngarawuhin karyya hayu Atma-Wedana, minakadi mavbhakti ring sang wenang kabhaktinin, dados, naghing tan wenang ngarap, ngarembat,nyuwun, ngamel saupakaran puspa lingga.
 8. Yan wenten sinalih tunggal krama Desa durung tutug cuntaka kadi hinucap ring harep, mamurug larangan, yan wenten ngatengahanag ka Desa, Parjuru Desa Desa niwakang pamidandha, yogya sang mamurug marisuddha sakabwatan manut panglokika
 9. Yan wenten sinalih tunggal anak istri, sangkaning tan meha ngrajaswala sasampun ring pura, wiyadin ring genah larangane sewosan, raris kacirenan, wenang ya tiwakin dandha tan meha, yogya marisudha genah punika
 10. Yan wenten sinalih tunggal krama Desa, kacuntakan antuk ngaraksa sawa, wiyadin layon, napkala pagilih pagentosan babanjaran ngaci-aci, ring sinalih tunggal kahyangan Desa, pacaruan ring Desa, sadurung tutug sengker cuntakanya, wenang tan tedun mayahan, tan dinosan, nanging yan wenten pasadok sang cuntaka ring Parjuru Desa Desa. Yan wus tutug cuntakane, patut naregteg yan sasampun tutug sengker punah cuntakane, dados kahetang pangargga
 11. Yan cuntaka gamya gamana, prakangge Desa nyantosang pamutus sang amawa rat. Yan sampun wenten pamutus saking sang amawa bhumi, ring Desa katiwakin dandha kadi ring sor puniki, lwire ;mangda mrayascita raga, genah malaksana, kahyangan Desa, miwah Desa pakraman. Prade yan katiwakin pamidandha mamandal, prasidha Desa sane mrayascita Desa miwah kahyangan, sang mamandal kabawosan ring Desa, kaicen pamutus antuk Parjuru Desa Desa, manut pamutus pararem Desa
 12. Cuntaka sangkaning mabhukti salah timpal, cuntaka ragan sang malaksana miwah Desa pagenahanya, tutug cuntakanya yan sampun sang malaksana mrayascita panyangaskara raga, genah malaksana, selanturnya mrayascita Kahyangan Desa miwah Desa pakraman. Buron sane kaajak matemu smara, kapademang, bangken buron punika katanem

13. Anak luh beling tan kapariangken, suwenne cuntaka kantos lekad rarene saha wenten pangupakara panyangaskara kulawisuddha
14. Yan wenten anak mabhukti nyolong smara, cuntaka pateh ring cuntaka gamya gamana.

Pawos 36

1. Indik Sosot

- ha. Yan wenten sinalih tunggal pacang nahur sosot wiyadin punagi, salwiring punagi, gumanti sane patut nganggen pemegat sot, tan dados nahur sot yan tan kalaning dina piodalan Bhatara. Ngadasa dinayang haci-aci, sang pacang nahur punagi patut sampun masadok ring kliyang lan pamangku, panahuran punagi ika kapuput antuk pamangku
- na. Yan wenten sinalih tunggal nahur sasangi pacang ngaturang pangodal, hugi mangda ring dina pagantos piodalane. Sang nahur punagi, wenang nunas kanti patulung karyya ring Desa. Sang nahur sasangi nyukserahang daging cumek saprabeyaning pangodal ring Desa
- ca. Yan wenten sinalih tunggal nahur sasangi maturan swaran tangguran salwiring tatabuhan, sasalohan, minakadi salwir ipun, munggwing prabeya punika sami kahangganin antuk sang masasangi.

2. Indik Haturan :

Yan wenten sang sapisira hugi ngaturang jinah, mwanng sarupaning barang, punika sami patut kahunadikayang antuk Parjuru Desa Desa, Haturan punika kaungghang sajroning lekita

3, Sasarin Canang .

Sasampun puput pangaci-ci pujawaline, sasarin canang punika kapupulang saha kawilangin. Kahunadikayang antuk Parjuru Desa Desa.....

Palet 2

Indik Resi Yadnya

Pawos 37

1. Krama Desa Pakraman Gumung, yogya ngawreddhiyang kapradnyanan, kautaman Sang Hyang Aji, asewaka nunas pawarah ring sang maraga widagdha pradnyan, pingajeng ring sang kasinanggah guru loka
2. Parjuru Desa Desa, kliyang-kliyang banjar, ngutsahayang kawreddhiyan kamuruban kaultaman Sang Hyang Aji ngawentenang pasamuhan-pasamuhan, parembungan, pinaka genah krama Desa mamangguhing pawarah-warah hayu
3. Kalaning diwasa hayu, wenang Desa atirthayatra, wenang Desa ngaturang puniya miwah rsi bhojana ring Ida Sulinggih, taler kalaning karyya utama, ring Desa

Pakraman Gumung, salwiring karya sane kaputus antuk Ida Sang Sulinggih patut ngaturang punia. Asapunik a taler ring sang mapitulung wenang maweh dana

4. Sang sapisira hugi krama Desa Pakraman Gumung yan mapakayun pacang mapodgala, taler mangda wenten pasadok mapihuning ring Parjuru Desa, sajaba patut polih

Palugrahan saking Parisadha Hindu Dharma

5. Parjuru Desa Desa, mamatut pisan, yan krama Desane mapuniya ring sang prajnyan, ring sang widagdha, ring sang satata ngarajegang dharma pingajeng ring Sulinggih pasuryan nyane sowang-sawang

Palet 3

Indik PitraYadnya

Pawos 38

1. Pamargi ngupakara sawa, hugi manut linghing sastra Agama Hindu. Wenten makudang-kudang soroh, sakadi hinucap ring sor puniki :
 - ha. Mapendhem ring prathiwi
 - na. Makingsan ring ghni,
 - ca. Atiwa-tiwa, utawi palebon utawi ngaben
 - ra. Yan rare durung makupak huntu (meketus), wus kepus hodel hantaka (kepus Puser), wenang
ngangge pangentas bangbang masadhana klungah kelapa gadhing, ngaran ngalungah, tan wenang tiniwaken
 - ka. Yan rare durung kepus hodel, pamali ngaran, pendhem juga tan hana pangupakaranya, ,kewala ganten utawi hadem paicchan Ida Sulinggih
2. Sang sapisira hugi krama Desa Pakraman Gumung, tan kawasa makta sawa ka Desa pakraman, yan sawa ika sampun keni pangupakara sawa.
Yan wenten mamurug, yogya katiwakin dandha, mrayascita marisuddha Desa
3. Salwiring upacara atiwa-tiwa, palebon, ngaben, ring setra hugi kawenanganya, tan wenang ring Desa pakraman, sajaba malebonang Ida Sulinggih. Yan wenten mamurug, wenang dandha marisuddha Desa, krama Desa sang atulung dandha artha manut pangargan beras 100 Kg kang sadiri.
4. Yan wenten krama Desa ngurung sawa, macamana, mabresih, kawenanganya tan kalugra lintangan ring tigang sasih ngawit saking dina sedane. Yogya murnama tilem, miwah salwiring upacara rerahinan. Yan kalaning angurung sawa, sajroning Desa Pakraman Gumung kawangunang Karya Agung kantos nyuci gening, lwire matabuh gentuh, Bhatara turun kabeh, karya Agung ring Besakih yogya tumpang salune tedunang saking baleen, genahang ring natah umahe, saking Bhatara kodhal kantos ida masineb, sajaba layon Ida Padanda.
5. Tan wenang nyekeh sawa ring pumahan yan tan macamana, mabresih, lintangan ring roras dina, ngawit saking dinane seda. Yan wenten mamurug, dandha gung artha manut pangargan beras 100 Kg saha mrayascita Desa

6. Sang sapasira hugi krama Desa Pakraman Gumung tan wenang atiwa-tiwa, rikala pangacin-acin Desa Iwire ; Patirthan,patoyan,Usabha ring Pura Puseh, Bhatara Turun Kabeh, Tabuh Gentuh minakadi karyya agung sewosan
 - ha. Yan piodalan patirthayan paptatoyan,pangusabhan, ring Pura Kahyangan Desa, saking mitung dinayang aci-aci, kantos Bhatara puput masineb
 - na. Yan karyya matabuh gentuh, Bhatara turun kabeh, minakadi salwiring karya sane nyuci gening, saking ngawit nyuci kantos Bhatara puput masineb
 - ca. Yan kalaning Bhatara ring Besakih lungha makakobok ka Klotok, saking ngawit nyuci gening ring Besakih, kantos Ida Bhatara puput masineb. Yan wenten mamurug, dandha mrayascita Desa, minakadi krama Desa sane matulung dandha gung artha manut pamutus pararem
7. Yan wenten krama mendhem sawa kalaning dina malarang, kawasa, nanging hugi masawen, durung magagumuk masusunin bintak, laku kingsan ngaran
8. Yan makingsan ring ghni, sawa gineseng, hasti hinanyut, manut krama. Yogya ngangge tirtha pabresihan. Mungging dewasa, sa sor ipun dewasane dados marginin mendem sawa.
9. Indik Padewasan :
 - ha. Padewasan mendem ring prathiwi, makingsan ring ghni, wenang katiwakang antuk Keliang Desa utawi Keliang Banjar, manut pasobhaya.
 - na. Padewasan atiwa-tiwa, katiwakang antuk Ida Sang Sulinggih sane pacang muput, yogya sampun kapatut antuk Parjuru Desa Desa
 - ca. Indik larangan ngupakara sawa, sajaba ngunggahang ka tumpang salu, sane kamanggehang sajroning Desa Pakraman Gumung, Iwire ; Kala gotongan,Semut sidulur,lan Ingkel wong
Yan wenten sinalih tunggal mamurug, wenang dandha gung artha manut pangargan beras 100 Kg, saha mrayascita Desa,miwah nenten dados ngangge piranti; margi,setra duwen Desa
 - ra. Tan wenang ngagah ngulung, teges ipun, sajroning setra tunggil, tan dados mresihin sawa, nuju dina pangutangan yan ring setra punika wenten ngalaksanayang pangabenan, Yan wenten mamurug, dandha gung artha manut pangargan beras 100 Kg saha mrayascita setra
 - ka. Tan wenang ngutang ngirim, teges ipun,sajroning setra tunggil, yan wenten ngirim, tan dados sane sewosan mendem sawa, minakadi atiwa-tiwa, ngaben, ring dina punika. Yan wenten mamurug, yogya dandha gung artha manut pangargan beras 100 Kg, saha mrayascita setra
10. Yan sawa sangkaning salah pati, ngulah pati, mati kapangawan, minakadi salwir ipun, Desa tan ngalarangin, yan sawa punika tiniwaken, pramangke.Sara ledang sang madruwe, minakadi Ida Sulinggih sane pacang muput / taler kelugra antuk prajuru desa
11. Yan wenten sinalih tunggal sawa, genahe seda wiyadin padem sajabaning karang pomahan, Iwire : ring tegal, ring carik, pura, pasar, banjar, sekolah, minakadi

genah sewosan dudu karang pomahan, yogya sang madruwe wirange mrayascita marisudhha genah punika. Yan sawa tan kaparihangkennan, genah punika patut kaparisuddha kaprayascita antuk sang madruwe hemponan

Pawos 39

Indik Angatma wedhana

1. Sang sapasira hugi krama Desa Pakraman Gumung, yan kalaning angatma wedhana lwire :
Ngeroras, patileman, baligya, tan wenang ngawangunang payadnyan, petak ring Pura Kahyangan Desa, minakadi kahyangan sewosan
2. Sang sapasira hugi wus ngawangun karyya angatma wedhana, yogya karang ika kapralina, sakasep ipun petang dasa kalih dina saking dina karyyane

Palet 4

Indik Manusa Yadnya

Pawos 40

1. Sang sapasira hugi krama Desa Pakraman Gumung, ngawangunang salwiring upacara manusa yadnya, tan wenang magenah ring wewidangan palemahan kahyangan panyiwian Desa. Yan wenten sinalih tunggal mamurug, wenang dandha gung artha manut pangargan beras 500 Kg, saha mrayascita marisuddha pura punika.
2. Sane kalugra mawinten magenah ring pura sinalih tunggal, sang sapasira hugi krama Desa sane pacang kahadegang dados pamangku, pinaka jan banggul Bhatara ring pura kahyangan hinucap. Taler sane kahadegang pinaka pranggen Desa, wenang mawinten majaya-jaya ring Pure genahnyane ngayah
3. Indik manusa yadnya sane dados kamargiyang sajroning Desa Pakraman Gumung hugi sane nganutin dresta kuna minakadi sastra Agama

Palet 5

Indik Bhuta Yadnya

Pawos 41

1. Sajroning Desa Pakraman Gumung, pacaruwan manut hunggwan, kalih sor singgih, lwire :
 - ha. Pacaruwan Desa sadakala :
 - Manca-satha ngamasa-masa, kala tileming kasanga, magenah ring catus pathan banjar sowang-sowang
 - na. Pacaruwan Desa padgatakala, ri kala jagate kabrebehan, kagringan, kadurmanggalan, katiben panca-bhaya, miwah sane sewosan sane patut caronin
 - ca. Agung alit caru, manut hunggwan acaru, babwatan pacaruan, kalih nista madhya uttamaning caru

2. Pacaruwan ring pura-pura kahyangan, pamrajan, dadya, salwire, manut drestan pura sowang-sowang, minakadi awig-awig gagaduhan pura hinucap
3. Pacaruwan ring sajroning Desa Pakraman Gumung, Tilem Kapitu, Tilem Kasanga, raris pacaruwan ring karang pomahan sowang-sowang
4. Yan wenten sinalih tunggal pura kahyangan, salwire, reneng pacarune kantos tigang plabuh, wenang Parjuru Desa Desa mamawosin. Yan wus puput babawose yogya maguru piduka, ngawit masasapuh, mangda kasiddhan ngaturang pangaci-aci
5. Yan wenten sinalih tunggal banjar pakraman,reneng pacarune ngantos tigang plabuh, yogya Kliyang Desa sane ngawiwenang mamawosin. Yan puput babawose, yogya katur ka Desa, Parjuru Desa Desa mamawosin tur ngicenin pamutus
6. Pacaruwan kalaning Tilem Kasanga, ring karang pomahan sowang-sowang manut sastra dresta, kalanturang antuk brata panyepian=====

SAT SARGGAH

SUKERTA TATA PAWONGAN

Palet 1

Indik Rangkat

Pawos 42

1. Indik rangkat punika, manut Desa kala patra, mwang sima dresta, sane kapatutang tur katinutin antuk krama Desa sowang-sowang, tan singsal ring uger-uger panagara, lwire :
 - ha. Papadikan
 - na. Ngarangkat utawi ngarorod
 - ca. Ngunggahin
2. Sajroning Desa Pakraman Gumung, indik rangkat ika yan sampun mawidhi widana pawiwahan, sanistanya mabiyakawon tur malukat, rangkat punika kasinangguh puput palikrama.
3. Yan wenten anak istri Desa Pakraman Gumung, karangkatang antuk sang sapasira hugi, lwih antuk anak saking dura Desa, yan kantos arahina ring awengi saking dina matinggale saking jumah tan wenten pasadok, pajati, yogya sang madruwe wirange nunas kanti ring Parjuru Desa Desa, mangda ngamarggiyang sasrepan. Yan sampun sinah genahnya, ngraris kamarggiyang panegdeg.
4. Sang sapasira hugi krama Desa Pakraman Gumung, yan karawuhan tamyu praya masinutan malarapan antuk ngrorod, hugi mangda masadok mihuningang ring prakangge Desa, prakangge Desa yogya maritetes, yan sangkaning tan patut pamarggin rangkatnya, Parjuru Desa Desa nguduhang mangda katur ring sang amawa rat. Yan wenten krama mamurug, yogya sang mamurug dandha gung artha manut pangarggan beras 50 Kg
5. Yan wenten sinalih tunggal krama Desa Pakraman Gumung, ngamet anak istri antuk malegandang, mamendet, marikosa, miwah salwiripun, tan sangkaning

sami demen, tan yogya pinuput widhi widhana pawiwahannya sadurung wenten pamutus saking Guru Wisesa

6. Yan wenten sinalih tunggal saking dura Desa, pacang muput rangkat kawawengkon Desa Pakraman Gumung, sang madruwe wiring luh yogya nunas pasaksi ring Parjuru Desa Desa Pakraman Gumung, sinalih tunggal mangda wenten ngarawuhin
7. Yan wenten anak istri saking Desa Pakraman Gumung merangkat, ring sampun puput rangkat punika, raris nyongkol ka umah wiring istrine, patut ngaturang panebas kanya ka Desa Pakraman Gumung artha manut pangargan beras 25 Kg

Palet 2

Indik Belas Makurenan Utawi Nyapian

Pawos 43

1. Sane kabawos nyapian, punika sang palas marabi, palas makurenan, sane sampun katiwakan pamutus antuk Guru Wisesa
2. Yan wenten sinalih tunggal krama Desa, ngarangkatang sapiyan, sadurung tigang sasih utawi 105 dina, saking dina palase, yogya sang ngarangkatang sapiyan punika keni dandha pakerang manut pangargan beras 100 Kg
3. Krama Desa sane belas marabi utawi makurenan, sasampun polih pamutus saking Guru Wisesa patut masadok mihuningang ring kliyang banjar, mangda kadamyakang ring banjar ring Desa, sakasep ipun asasih saking palase
4. Yan wenten anak istri wit saking wawengkon Desa Pakraman Gumung nyapian ring dura Desa, mawali ka Desanya, yogya sang madruwe wiring matur supeksa ring Parjuru Desa Desa, saha mrayascita marisuddha anake luh punika. Yan tan kaparisuddha antuk wirangnya, patut marisuddha raga, mangda kabawos nirmala
5. Yan wenten anak istri matinggal saking lanange tur wenten magenah ring wiring istrine lamine lintang ring nem sasih, saha sampun polih panregteg saking lanange kantos ping tiga, patut katur ring Parjuru Desa Desa, mangda kabawosan.yening memurug wirangnya katiwakin dande manut penglokika.

Palet 3

Indik Balu

Pawos 44

1. Sane kabawos balu, anak istri sane katinggal seda antuk rabine. Yan anak lanang seda rabine, wiyadin katinggal nyapian, taler kawastanin balu.
2. Yan wenten sinalih tunggal krama Desa lanang balu, wiyadin istri balu, ngawengku karang Desa, yogya nawur p anigasanan beras 5 Kg satunggil Usabha Puseh
3. Yan wenten lanang balu, madruwe sentana utawi oka istri sanpun hantes mayahan, yogya mayahan bulangkep
4. Yan wenten anak istri balu, madruwe Santana utawi oka lanang sampun hantes mayahan, yogya mayahan bulangkep.

5. Yan wenten sinalih tunggal anak istri balu, marangkat, yogya rangkat punika kapuputang antuk wirang lakine rihin, yan babalon punika kari pageh
6. Mungging wawenangan babalon luh, ring indik wawarisan, minakadi sane sewos-sewosan, nganutin uger-uger sane karajegang antuk guru Wisesa

Palet 4

Indik Santana

Pawos 45

1. Sajroning Desa Pakraman Gumung, ngarajegang pidabdab Santana kapurusa siddhikara tunggal, paperasan, tunggal dadya
2. Sang sapisira hugi sinalih tunggal krama Desa Pakraman Gumung, meras Santana, nuduk mantu, makedihang utawi nyerahang raga, yogya sangkaning radin, tunggal siddhikara, tunggal dadya, saha polih palugrahan saking Guru Wisesa
3. Indik meras sentana, nuduk mantu, nyukserahang raga, yogya nganggen upacara, manut sastra agama Hindu, sakabwatan swang, sinaksenan dening Parjuru Desa Desa Gumung tur kadamyakang ring pasamuhan Desa kadulurin antuk likita pamikukuh saking Guru Wisesa

Palet 5

Indik Wawarisan

Pawos 46

1. Lwir sane wenang kawarisin :
 - ha. Hamong-hamongan ring Desa, ayah-ayah saurah-arih
 - na. Hutang piutang sang kawarisin
 - ca. Saraja druwe, brana, tegal, carik, tatamiyan, sakancan kasugihan.
 - ra. Sangkaning polih pitemes antuk sang kawarisin sang madruwe salwir sane dados kawarisang, pinih akeh apahtigayan saking padruweyan nyane maka piilih-olih pagunakayan, saha kadulurin lekita pamikukuh saking Guru Wisesa.
2. Sane wenang ngawarisin :
 - ha. Manut lalintih paprenahan adoh tampek saking purusa tunggal siddhikara tunggal dadya
 - na. Putra dadaman utawi putra paperasan
 - ca. Mantu dadudukan, minakadi Santana saking nuduk mantu
3. Sang sapisira hugi krama Desa Pakraman Gumung, yan tilar saking agama Hindu tan yogya ngawaris sane kamulan patut warisin
4. Ngedum wawarisan, kapatut sasampun puput upacara pitra yadnya sang ngawarisang bhrana kalih kasugihan punika, pinih sor sasampun mahabenang. Sane dados dum, sajaba sane mangge padagingan pangaci-aci, minakadi salwiring sane mange piranti ngalaksanayang upacara Agama, pustaka-pustaka sane kapingitang salwir ipun.
5. Sang sapisira krama Desa pakraman Gumung sane camput wenang kacamput antuk Desa saha kaupacaranin sapuputan antuk Desa

SAPTAMA SARGGAH

WICARA LAN PAMIDANDA

Palet 1

Indik Wicara

Pawos 47

1. Salwiring wicara indik pakraman, ring wawidangan Desa pakraman Gumung, wenang rinawosan antuk Parjuru Desa Desa. Yan tan kasiddhan puput ; Parjuru Desa Desa ngaturang ring Pasamuhan para Parjuru Desa Desa ngaturang ring Guru Wisesa buwat matatimbang
2. Yan wenten wicara indik pakraman ring banjar, pamaksan, subak, minakadi seka-seka sewosan, yoga kabawosan antuk Parjuru Desaya sowang, yan tan kasidhan, wenang katengahang ka Desa, Parjuru Desa Desa yoga mamawosin
3. Yan pamutus wicara sane katiwakang antuk Parjuru Desa Desa Pakraman Gumung, tan katinutin utawi tan kahiring antuk sang mawicara, wenang sang mawicara nunasang pangrawos ring sang patut mamawosin, ring Guru Wisesa
4. Yan sang mawicara taler tan tinut ring pamutus wicara sane katiwakang hinucap ring hajeng, prasiddha sang mawicara tan polih panyanggran Desa, minakadi, tan dados nganggen sapatruweyan Desa, kaheladang utawi kanorayang saking Desa kantos puput wicaranya.

Palet 2

Indik Pamidandha

Pawos 48

1. Lwiring pamidandha sane wenang katiwakang antuk Parjuru Desa Desa, banjar pakraman, subak, pamaksan, seka-seka sewosan, sawawengkon Desa Pakraman Gumung sakadi ring sor puniki :
 - ha. Dandha artha
 - na. Dandha ayah-ayahan
 - ca. Upasaksi, Dewa saksi, pangrarata, sumpah,
 - ra. Danda panyangaskara, lwire : mrayascita, marisuddha, miwah salwiripun
 - ka. Tan keladenan lan kanorayang saking krama Desa
 - da. Pamidandha sewosan manut palugrahan Guru Wisesa
2. Patiwak pamidandha, manut hunggwan wicarane sowang-sowang, minakadi werat ringan wicarane hinucap lwire :
 - ha. Yan wicara ring Desa Pakraman, yoga kapidandha antuk Desa. Mungging dadandhan mantuk ka Desa.

- na. Yan wicara ring Banjar Pakraman, katiwakin pamidandha ring banjar ika, dadandhan mantuk ka banjar
- ca. Yan wicara ring subak, ring pamaksan minakadi ring seka-seka sewosan, katiwakin pamidandha ring kuwu tempeknya sowang. Mungging dadandhan mantuk kajroning kuwu tempeknya
3. Agung alit dandha, manut panglokikan agung alit werat ringan kasisipane, sane mungguh ring awig-awig gagaduhanya sowang, minakadi paswara pinaka pamutus pasamuhan

ASTAMA SARGGAH

NGUWAH-NGUWUHIN AWIG-AWIG

Pawos 49

1. Sane wenang uwuhin utawi uwahin inggih punika, pasukretan, paswara, pamutus, pararem, wiyadin pamutus pasamuhan miwah sane sewosan sapanunggilan ipun
2. Indik nguwahin kalih nguwuhin pasukretan, paswara, pamutus, pararem, wiyadin pamutus Pasamuhan miwahh sane sewosan manut tata kramaning Pasamuhan.
3. Indik nguwahin kalih nguwuhin Awig-awig, manut tata kramaning Pasamuhan, sasampun nunas tatimbang ring Guru Wisesa kalih polih palugrahan sang amawa bhumi

NAWAMA SARGGAH

P A M U P U T

Pawos 50

1. Awig-awig puniki mawasta : “ AWIG-AWIG DESA PAKRAMAN GUMUNG”.
2. Awig-awig puniki pinaka bantang sahananing awig-awig, paswara, pasukretan, miwah salwir ipun, sane mange ring sowang-sowang banjar pakraman, pamaksan, pura, subak, seka-seka sane wenten sajroning Desa Pakraman Gumung
3. Banjar, kahyangan pamaksan, subak, seka-seka sane wenten sajroning Desa Pakraman Gumung wenang ngawangunang awig-awig, pasukretan, paswara, gagaduhan, sowang-sowang, nanghing daging ipun tan yogya singsal tungkas ring Awig-awig Desa Pakraman Gumung
4. Salwiring sane durung mungguh ring Awig-awig puniki, kaungguhang sajroning paswara, pamutus pasamuhan Desa Pakraman Gumung

Awig-awig Desa Pakraman Gumung 20

5. Dresta kuna sane kari dados angge, yan tan tungkas ring daging awig-awig Desa Pakraman Gumung manut kojaring sastra agama Hindu, hanut ring Uger-uger nagara, saha kaputusang sajroning Pasamuhan Desa Pakraman Gumung
6. Awig-awig Desa Pakraman Gumung, pawangun Krama Desa Pakraman Gumung, kapastika manut upacara Agama Hindu, kala
dina.....
Sasih..... Tanggal utawi panglong.....rah.....
Tenggek, Isaka....., magenah ring Pura Puseh Gumung,
Kapuput antuk Ida Padandha.....
Saking Griya.....
7. Awig-awig puniki kalingga tanganin antuk Parjuru Desa Desa, Iwira : Kliyang Desa, Panyarikan, Sedahan/Juru raksa, Kerta Desa, Saha kasarengin antuk Kliyang-kliyang banjar pakraman, kasaksinin antuk Kliyang Banjar Dinas, Prabekel Tenganan, Camat Manggis, kakukuhang olih Bupati Karangasem
8. Awig-awig puniki kalaksanayang ngawit dina pamasupatian.....
kantos salanturipun
9. Lwir sang ngalingga tanganin :

Parjuru Desa Desa Pakraman Gumung Kretta Desa Pakraman Gumung
1.Kliyang Desa utawi BenDesa, 1.

(I Nengah Kari)

2.Panyarikan,

(I Komang Landep)

3.Sedahan/Juru raksa,

(I Komang Widana)

4. Kliyang- kliyang Banjar Pakraman :

1.Kliyang Banjar Pakraman Gumung 2.Kliyang Banjar Pancingan

I Wayan Sukarai

S a k s i - s a k s i :

1,Kliyang Banjar Dinas Gumung

I Wayan Sudana Wirawan,S.Ag

Prebikel Desa Gumung

Camat Manggis

I Putu Yudiana,ST

Kalekitayang ring Kantor Bupati Karangasem :

duk rahina.....tanggal Masehi.....

Register Nomor

BUPATI KARANGASEM

(.....)

Puput katureksa ring MADP Kec.Manggis tanggal.....

Puput katureksa ring Kabupaten, tanggals/d.....

